

## 《佛說五王經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 14, No. 523

### No. 523

#### 佛說五王經

##### 失譯人名今附東晉錄

昔有五王。國界相近。共相往來。不相攻伐。唯作善友。其最大者。字普安王。習菩薩行。餘四小王。常習邪行。大王憐愍。意欲度之。呼來上殿。共相娛樂。乃至七日。終日竟夜。作倡伎樂。七日已滿。四王共白天王言。國事甚多。請還政治。大王語諸左右。嚴駕車乘。群臣吏民。都共送之。至其半道。大王憐愍。意欲度之。語四王言。各說卿等所樂之事。一王言。我願欲得陽春三月樹木榮華遊戲原野。是我所樂。一王復言。我願欲得常作國王。鞍馬服飾。樓閣殿堂。官屬人民。圍遶左右。晃晃昱昱。椎鍾鳴鼓。出入行來。路人傾目。是我之樂。一王復言。我所樂復異。願得好婦好兒。端正無雙。共相娛樂。極情快意。是我之樂。一王復言。我所樂復異。願我父母常在。多有兄弟妻子。羅列好衣美食。以恣其口。素琴清衣。共相娛樂。是我之樂。各自說其所樂竟。四王俱迴頭白。其大王王所樂何事。大王答言。我先說卿等所樂。然後說我之樂。卿一人言陽春三月樹木榮華。遊戲原野。秋則凋落。非是久樂。卿一人言。願我常作國王。鞍馬服飾。樓閣殿堂。官屬人民。圍遶左右。晃晃昱昱。椎鍾鳴鼓。出入行來。路人傾目。往古諸王。隱隱闐闐。快樂無極。福德轉盡。諸國相伐。忽然崩亡。非是久樂。卿一人言。願得好婦好兒。端正無雙。共相娛樂。極情快意。一朝疾病憂苦無量。非是久樂。卿一人言。願我父母常在。多有兄弟妻子。羅列好衣美食。以恣其口。素琴清衣。共相娛樂。一朝有事。為官所執。繫閉在獄。無有救護。此非久樂。四人俱問。王樂何事。王言我樂不生不死。不苦不惱。不饑不渴。不寒不熱。存亡自在。此是我樂。四王俱言。此樂何處當有明師。大王答言。吾師號為佛。近在祇桓精舍。諸王歡喜。各詣佛所。皆稽首作禮。退坐一面。大王胡跪。叉手白佛言。我等今得為人。鈍闇無智。但深著世樂。不知罪福。願佛為弟子等。說其苦諦。佛言卿等善聽。當為汝說。人生在世。常有無量眾苦切身。今粗為汝等略說八苦。何謂八苦。生苦老苦病苦死苦。恩愛別苦。所求不得苦。怨憎會苦。憂悲惱苦。是為八苦也。何謂生苦。人死之時。不知精神趣向何道。未得生處。並受中陰之形。至三七日父母和合。便來受胎。一七日如薄酪。二七日如稠酪。三七日如凝酥。四七日如肉臠。五匏成就。巧風入腹。吹其身體。六情開張。在母腹中。生藏之下。熟藏之上。母噉一杯熱食。灌其身體。如入鑊湯。母飲一杯冷水。亦如寒冰切體。母飽之時。迫迮身體。痛不可言。母饑之時。腹中了了。亦如倒懸。受苦無量。至其滿

月。欲生之時。頭向產門。劇如兩石挾山。欲生之時。母危父怖。生墮草上。身體細軟。草觸其身。如履刀劍。忽然失聲大呼。此是苦不。諸人咸言。此是大苦。何謂老苦。父母養育。至年長大。自用強健。擔輕負重。不自裁量。寒時極寒。熱時極熱。饑時極饑。飽時極飽。無有節度。漸至年老。頭白齒落。目視眩眩。耳聽不聰。盛去衰至。皮緩面皺。百節痠疼。行步苦極。坐起呻吟。憂悲心惱。識神轉滅。便旋即忘。命日促盡。言之流涕。坐起須人。此是苦不。大王答曰。實是大苦。何謂病苦。人有四大。和合而成其身。何謂四大。地大水火大風大。一大不調。百一病生。四大不調。四百四病。同時俱作。地大不調。舉身沈重。水大不調。舉身臃腫。火大不調。舉身蒸熱。風大不調。舉身掘強。百節苦痛。猶被杖楚。四大進退。手足不任。氣力虛竭。坐起須人。口燥唇焦。筋斷鼻坼。目不見色。耳不聞聲。不淨流出。身臥其上。心懷苦惱。言輒悲哀。六親在側。晝夜看視初不休息。甘饈美食。入口皆苦。此是苦不。答言實是大苦。何謂死苦。人死之時。四百四病。同時俱作。四大欲散。魂魄不安。欲死之時。刀風解形。無處不痛。白汗流出。兩手摸空。室家內外。在其左右。憂悲涕泣。痛徹骨髓。不能自勝。死者去之。風去氣絕。火滅身冷。風先火次。魂靈去矣。身體挺直。無所復知。旬日之間。肉壞血流。臃脹爛臭。甚不可道。棄之曠野。眾鳥噉食。肉盡骨乾。髑髏異處。此是苦不。答言實是大苦。何謂恩愛別苦。室家內外。兄弟妻子。共相戀慕。一朝破亡。為人抄劫。各自分張。父東子西。母南女北。非唯一處。為人奴婢。各自悲呼。心內斷絕。窈窈冥冥。無有相見之期。此是苦不。答言實是大苦。何謂所求不得苦。家有財錢。散用追求。大官吏民。望得富貴。勤苦求之。求之不止。會遇得之。而作邊境令長。未經幾時。貪取民物。為人告言。一朝有事。檻車載去。欲殺之時。憂苦無量。不知死活何日。此是苦不。答曰實是大苦。何謂怨憎會苦。世人薄俗。共居愛欲之中。共諍不急之事。更相殺害。遂成大怨。各自相避。隱藏無地。各磨刀錯箭挾弓持杖。恐畏相見。會遇迕道相逢。各自張弓澌箭。兩刀相向。不知勝負是誰。當爾之時。怖畏無量。此是苦不。答曰實是大苦。何謂憂悲惱苦。人生在世。長命者乃至百歲。短命者胞胎傷墮。長命之者。與其百歲。夜消其半。餘有五十年。在醉酒疾病。不知作人。以減五歲。小時愚癡。十五年中。未知禮儀。年過八十。老鈍無智。耳聾目冥。無有法則。復減二十年。已九十年。過餘有十歲之中。多諸憂愁。天下欲亂時亦愁。天下旱時亦愁。天下大水亦愁。天下大霜亦愁。天下不熟亦愁。室家內外多諸病痛亦愁。持家財物治生恐失亦愁。官家百調未輸亦愁。家人遭縣官事閉繫牢獄。未知出期亦愁。兄弟妻子。遠行未歸亦愁。居家窮寒。無有衣食亦愁。比舍村落有事亦愁。社稷不辦亦愁。室家死亡。無有財物。殯葬亦愁。至春時種作無有犁牛亦愁。如是種種憂悲。常無樂時。至其節日。共相聚。應當歡樂。方共悲涕相向。此是苦不。答曰實是大苦

爾時五王。及諸群臣。會中數千萬人。聞說諸苦諦。心開意悟。即得須陀洹道。皆大歡喜。作禮而去。四王俱白普安王言。大王真是大權菩薩。化導我等。令得道跡。大王之恩。我本觀諸宮殿。心情愛著。不能遠離。今觀宮殿。如視穢廁。無可愛者。即捨王位。付弟出家。為道修諸功德。日日不倦